0.0.1 pubbanimittasuttam

- 1. vuttam hetam bhagavatā. vuttamarahatā'ti me sutam:
- 2. yadā bhikkhave devo devakāyā cavanadhammo hoti, pañcassa pubbanimittāni pātubhavanti: mālā milāyanti, vatthāni kilissanti, kacchehi sedā muccanti, kāye dubbaṇṇiyaṃ okkamati, sake devo devāsane nābhiramatī'ti.
- 3. tamenam bhikkhave devā 'cavanadhammo ayam devaputto'ti iti viditvā tīhi vācāhi anumodanti: "ito bho sugatim gaccha. sugatim gantvā suladdhalābham labha. suladdhalābham labhitvā suppatiţţhito bhavāhīti".
- **4.** evam vutte aññataro bhikkhū bhagavantam etadavoca: "kinnu kho bhante devānam sugatigamanasankhātam, kinca bhante devānam suladdhalābhasankhātam, kimpana bhante devānam suppatiţţhitasankhātanti?."
- 5. "manussattam kho bhikkhu devānam sugatigamanasankhātam yam manussabhūto samāno tathāgatappavedite dhammavinaye saddham paṭilabhati, idam kho pana bhikkhave devānam sujaddhalābhasankhātam. sā kho panassa saddhā niviṭṭhā hoti mūlajātā

patiţţhitā daļhāasaṃhāriyā samaṇena vā brāhmaṇena vā devena vā mārena vā brahmunā vā kena ci vā lokasmim. idaṃ kho bhikkhave devānaṃ suppatiţţhitasaṅkhātanti".

6. etamattham bhagavā avoca. tatthetam iti vuccati:

"yadā devo devakāyā, cavati āyusaṅkhayā; tayo saddā nīccharanti, devānam anumodatam:

'ito ho sugatim gaccha, manussānam sahavyatam; manussabhuto saddhamme, labha saddham anuttaram.

sā te saddhā niviţthassa, mūlajātā patiţthitā; yāvajīvaṃ asaṃhīrā, saddhamme suppavedite.

kāyaduccaritam hitvā, vacīduccaritāni ca; manoduccaritam hitvā, yañcaññam dosasañhitam.

kāyena kusalam katvā, vācāya kusalam bahum; manasā kusalam katvā, appamāṇam nirūpadhim.

tato opadhikam puññam, katvā dānena tam pahum; aññe'pi macce saddhamme, brahmacariye nivesaya¹.

imāya anukampāya, devā devam yadā vidū; cavantam anumodanti, ehi deva punappunanti."

7. ayampi attho vutto bhagavatā. iti me sutanti.

¹nivesaye. sū.